

欽定剿平粵匪方略

欽定勦平粵匪方略卷一百七十一 丁巳年

三月初一日 癸丑 曾國藩奏言臣接到家信

父於二月初四日病故臣例應丁憂溯查臣自咸豐二年奉

命典試江西行至太湖縣聞訃丁母憂回籍百日奉

旨飭辦團練三年冬間疊奉援鄂援皖肅清江面之

命聲明臣係丁憂人員辦理稍有起色卽當回籍補行

終喪五年九月蒙

恩補授兵部右侍郎維時雖已服闋而臣之私心常以未得守制爲隱憾今又遽丁父憂椎胸自責抱痛何極瑞州去臣家不過十日程途應卽日奔喪回籍臣經手事件以水師爲一大端署提督楊載福駐紮九江所統外江水師十五營道員彭玉麟駐紮吳城所統內湖水師八營合計船

隻五百餘號礮位至二千餘尊之多此非臣一人所能爲力臣在衡州時僅奏明造船百六十號岳州以下雖陸續增添而九江挫後則水師中衰其時回援湖北者僅船百餘號賴彭玉麟力支危局胡林翼楊載福重廓規模而又有廣東督臣購運洋礮湖南撫臣督率官紳廣置船隻子藥於是外江之水師始振陷八鄱湖者亦

僅船百餘號賴江西撫臣竭力維持增修船廠
籌備子藥於是內湖之水師亦振合四省之物
力各督撫之經營楊載福等數年之戰功乃克
成此一支水軍臣不過因人成事豈敢無其實
而居其名惟臣因事離營內外水軍或分歧不
定相應請

旨特派署提督臣楊載福總統外江內湖水師事務惠

潮嘉道彭玉麟協理外江內湖水師事務庶幾
號令歸一楊載福戰功最偉才識遠勝於臣彭
玉麟備歷險艱有烈士風伏乞

聖恩時加訓勵該二人必能肅清江面仍請

旨飭下湖北撫臣胡林翼月籌銀三萬兩江西撫臣文

俊月籌銀二萬兩解交楊載福彭玉麟水營俾
此軍不致飢疲則不特爲攻剿九江湖口所必

需卽將來圍攻金陵巡防長江亦必多所裨益
自水師而外惟湘勇係同縣之人寶勇係久從
之卒於臣略有關係現在李續賓之湘勇駐紮
九江精勁樸實隱然巨鎮劉騰鴻之湘勇普承
堯之寶勇駐紮瑞州嚴明勤謹足當大敵但使
餉項稍敷必可樹立功績臣在軍中亦無所益
卽不在軍亦無所損此外江西水陸諸軍及各

省援師自去歲以來皆由撫臣與臣會商調遣
今臣丁憂開缺應由福興與撫臣會商辦理近
日逆匪內亂武漢肅清袁州奉新等處克復江
西局勢似有轉機臣猝遭父喪不復能料理營
務合無籲懇

天恩准臣在籍守制稍盡人子之心臣已函商將軍福
興巡撫文俊酌請一人前來瑞州拊循各營將

上命軍機大臣傳諭福興文俊楊載福曰現在曾國藩
士臣卽由瑞州奔喪回里奏入

卽由瑞州回籍福興文俊何人前往瑞州接辦軍務
福興原擬往勦撫建一路今是否另派大員帶兵前
往撫建抑該將軍仍自行前往務須斟酌盡善不可
顧此失彼至曾國華本係降服著傳諭該員仍遵前
旨暫留江西管帶兵勇歸楊載福等調度俟曾國藩

假滿回至江西再令回籍其水師軍營所需糧餉最
關緊要著文俊設法籌辦並咨照官文胡林翼一體
籌撥接濟毋使缺乏楊載福駐紮九江屢獲勝仗今
命就近統帶曾國藩一軍聲勢必能聯絡著卽與彭
玉麟協力同心督兵勦辦

上諭內閣曰曾國藩現丁父憂業經降旨賞假三箇月
回籍治喪所帶湖南兵勇暫交其弟曾國華管帶惟

曾國華職分較卑仍須有大員統領方能得力所有
曾國藩前帶水師兵勇著派提督銜湖北鄖陽鎮總
兵楊載福就近統帶廣東惠潮嘉道彭玉麟協同調
度該侍郎假滿後著仍遵前旨卽赴江西督辦軍務
以資統帥

初二日 甲寅 德興阿翁同書奏言 臣等前以瓜州

賊匪意圖挺走亟宜約齊水陸夾攻因與總兵

陳國泰等密訂進攻之期一俟風順卽同時分
路並進二月初九日臣等督率東西兩岸官兵
分赴瓜州圍攻先由參將毛三元密派壯勇十
餘人潛入賊營放火殺死守更賊人賊衆大驚
堅壁不出而土橋焦山師船甫經起碇旋以風
逆未得駛上十五日又整隊而往先由上瓜州
出賊一股從富家井撲來其續出之賊約有二

三千名分作兩股旁抄經參領富明阿帶同營
總常壽等爲一隊營總蘇沖阿等爲一隊兩路
迎戰該逆抵拒不退守備王富來帶勇由叢葦
中斜擊而來與馬步各隊合併衝入賊陣立見
披靡紛紛敗走陳國泰亦派勇登岸協勦該逆
腹背受敵狂奔回巢共斃賊匪一百數十名維
時總兵鞠殿華等正由四里鋪帶兵力擣老巢

乘接仗時連奪險要撲濠而進營總德克津布
帶兵施放火箭賊中慌亂我兵仰攻三時之久
因天晚撤回十七十九等日狂風激浪舟師難
以駛攻陸軍列陣良久下瓜州出賊數十名百
餘名不等均被我軍殲殺殆盡二十日臣等分
督諸軍由四里鋪進勦銜枚疾走越過重濠不
見賊蹤用礮向賊巢轟擊亦無動靜總兵周士

法等督帶戰艇截抵金山江面就攻賊隄轟斃
紅衣賊匪數名忽由中下瓜州竄出賊匪數千
直向土橋奔竄撲我義勇營盤適陳國泰由江
邊龍灣登岸同營總常壽等暨義勇儀徵南勇
連壓數次將薄賊壘賊復添出逆黨千餘徑向
我軍直衝正相持間富明阿帶同王巨孝等間
道繞至應援擣賊中堅哈連升等亦帶勇繼進

連環衝擊該逆被我軍四面裹剿殺斃二百數
十名陳國泰水師兵勇繞回截擊賊衆狂奔遂
卽乘勝窮追時由大營派出接應之成明海全
各帶馬隊馳至併力鏖戰又斃賊百餘名惟水
師總因風色不順未得暢駛現乘此次勝仗復
激勵諸軍候風利天晴更圖采八冀得擒渠梟
穴

德興阿翁同書又奏言據留防浦口總兵安勇等報稱旬日以來江浦及九洑洲賊匪不時竄出二月十九日夜江浦城內之賊竄出放火勢將抄我營後路經該總兵等帶兵往安定橋小店一帶迎勦賊衆千餘蟻擁而來官兵鼓銳奮擊賊見勢衆敗走當卽追殺蓄髮賊二十餘名生擒長髮老賊四名二十日江浦賊匪又擾西

關花橋等處九洲賊匪同時竄至三板橋經
都司洪祿等分路擊退斃賊數十名等語臣等
正飭嚴密堵剿適接福濟來文以和州軍營被
圍咨由浦口酌撥官兵前往援應並據安勇等
亦以接到咨文令速撥兵查浦營兵數本屬無
多前月因廬州緊急甫經抽撥馬步隊七百餘
名交穆克登額統帶赴廬助剿已屬設法通融

聞

其時卽慮及浦營空虛檄飭添募練勇三百名
稍填缺額此時安能再應外援且江浦九洲
之賊現在勾結爲患尙虞防兵過單若再分撥
恐勦辦更形竭蹶奏入均報

同日福興文俊奏言臣福興由廣信赴省先與
臣文俊會晤曾國藩亦於二月初間回省當經

公同酌商以全局而言廣信一府爲全省藩籬
撫建兩郡賊蹤麇集兼之饒郡兵單難資堵禦
此時亟圖撫建自不可緩然要非集有重兵斷
不能銳意取勝曾國藩及臣文俊均以臣福興
此來聲威尙壯意在速進然遽以偏師輕於一
試設有挫衄轉於大局非宜約略計之總須勁
旅盈萬方敷勦辦至少亦須六七千始能著手

現在九江一帶水陸合圍勢難抽撥臨江吉安
本屬無兵可分至瑞州經曾國藩親督各營開
挖長濠四面圍困已大有可乘之機又恐兵分
力單或致功敗垂成其他則別無可調之師而
東路賊勢又不能任其滋蔓況議勦撫建尤須
先堵饒郡堵既不足勦更爲難正在籌議間復
據安仁貴溪弋陽等屬暨署廣信府知府沈葆

楨先後稟稱景德鎮續到賊匪數千竄至萬年
所屬之石鎮街由弋陽擾及河口鎮意圖上犯
廣信經駐貴溪之知縣李元度由弋陽一路跟
追嗣該逆復由河口竄至鉛山境內德興縣亦
有賊衆屯聚廣信郡城內外遷徙一空情形急
迫臣等伏思廣信一城該逆窺伺已久現在賊
蹤或直犯鉛山旁擾廣豐或回竄河口分掠興

安均無一定廣信要皆四面受困該郡原紮兵
勇合臣福興留駐之軍數僅二千雖有署衢州
鎮饒廷選添派兵勇五百名協防究嫌單弱其
地東北則浙界東南則閩界即使該逆不犯郡
城亦可由德興興安一帶旁竄閩境至浙省駐
守之兵止三千名經臣福興酌調二千名隨營
會勦惟該省續派防兵能否到齊尙未可定是

以仍令副將張從龍等暫紮原處應請

旨飭下閩浙督臣迅催添調之兵到防以便檄調張從

龍等進剿廣信關繫緊要此路一失則省會咽喉立梗各路餉道不通萬一撫賊與此股賊黨聯絡勦辦更屬費手爲今之計惟先守廣信爲要臣等意見相同臣福興擬卽趕緊由省趨程仍回廣信且就現有兵勇妥籌防剿一俟信防

無虞兵力厚集卽徑由廣信籌攻撫州其勢亦
順設兵力仍未湊齊或卽擇要先圖規復他郡
曾國藩昨已還至瑞州其臨江一路卽可就近
勦辦現在圍攻瑞郡不遺餘力總期此城一下
則可移兵進勦東路奏入

上命軍機大臣傳諭福興文俊王懿德慶端曰逆匪窺
伺廣信已非一日該郡爲江西全省藩籬且係接壤

閩浙福興現已帶兵赴剿擬請飭調張從龍之兵聽候調遣先保東路要區再圖規復他郡所籌尙合機宜惟閩浙崇安縣屬分水等關距鉛山甚近光澤縣黃石口村莊已被該逆焚燬聯甲兵勇退駐鐵牛關內外兼顧兵力不敷雖經王懿德等另調標兵一千名並募漳泉壯勇各五百名令署總兵懷他布帶往崇安駐紮而邊防喫重所有張從龍等兵勇此時自

難調往廣信據晏端書奏稱廣信存城兵勇尙有八千名足資堵剿是以令饒廷選駐紮玉山防堵福興抵廣信後如有可用之兵著酌量調撥或由貴溪弋陽鉛山等處相機進剿冀與閩兵會合王懿德等亦須飭令懷他布等隨剿隨進俟福興行近建昌卽行會合不得區分畛域株守閩疆至江西逆勢方張福興已赴廣信曾國藩卽行回籍瑞州一軍現派何員

接辦柳祇留曾國華統帶著文俊妥籌辦理隨時具奏

同日晏端書奏言據張芾咨稱上年十二月間賊犯祁門經署皖南鎮總兵江長貴擊退後該逆卽會合湖北敗匪併踞江西浮梁景德鎮偏近婺源張芾飛飭已革參將師長鑣擇險固守師長鑣親率各勇赴浮梁鯉魚橋巡哨該逆於

本年正月十七日全股竄往樂平二十二日復有股匪自鄱陽縣楓田街竄踞景德鎮師長鑣移營進逼亦卽竄往樂平其貴池之賊先於二十一日從香口竄入樺根嶺至祁門歷口地方江長貴飭令守備王恩榮等前往迎敵並移會總兵周天受馳往策應一面飛調七里亭崇覺寺兩路防勇星夜赴西武嶺以顧黟縣門戶二

十七日江長貴親至祁門督勦斬馘頗衆正鑾
戰間周天受督隊馳至前後夾擊大獲勝仗賊
遂敗退署黟縣知縣王垣復帶團馳赴柏溪助
戰該逆由大洪嶺竄至石埭縣六七都又經駐
防崇覺寺之都司吳偉奇於二月初二日督率
兵勇迎頭截擊提臣鄧紹良派副將蕭知音帶
勇會勦該逆連夜由陵陽鎮竄往青陽仍思抄

襲崇覺寺後路內竄涇縣鄧紹良又派遊擊石
玉龍等各帶兵勇助防涇縣兼以策應徽州其
樂平之賊先於正月二十六日紛竄弋陽二月
初二日竄河口鎮又竄石溪沿途焚掠逼近廣
衢二郡臣因三衢在防兵單當於省城添撥守
備黃熊飛全勇並咨鄧紹良抽撥彪勇星赴三
衢接應署廣信府知府沈葆楨函請署衢州鎮

饒廷選統兵前往調度饒廷選以該郡存城兵
勇不下八千名尙足以資堵剿而賊已蔓延於
鉛山廣豐一帶玉山常山江山開化處處戒嚴
如該鎮前赴廣信恐逆匪四竄回援莫及當與
署金衢嚴道繆梓籌商先飭遊擊楊國正等帶
浙兵七百名前往玉山駐紮以爲廣信三衢策
應饒廷選親帶彪勇於初八日赴玉山分紮營

壘居中調度其江山之官溪等處開化之白沙
關等處另撥兵勇分投布置以防樂平德興臣
查皖南江西沿江一帶已成賊匪往來熟徑刻
下蕪湖賊壘倍增黃池灣沚軍情又緊其鄱陽
西路之賊復竄踞景德鎮婺源祁門時恐疏虞
逆黨愈分愈多每於徽甯池太饒廣之間伺隙
乘虛潛圖內犯浙江以一省兼防數省面面受

敵實屬接應不遑東南大局攸關臣惟有隨時
咨行張芾等實力防剿務期固守疆圉奏入報

初五日丁巳福濟鄭魁士奏言二月十四日六安

州各員弁由木廠鋪帶練進攻接仗失利賊卽
馳抵馬頭集經壽州知州黃元吉帶勇截擊互
有殺傷十五日賊至板橋迎河等集距正陽關

更近署廬鳳道金光飭會同德勒格爾等迎擊
突遇馬賊無數經我馬隊追殺數十人餘卽退
回遙見步賊如蟻徧地撲來經官兵開放擡槍
擊斃多名賊又稍退十六日我軍整隊進剿正
鏖戰間忽見東南賊船五六百號連檣駛至卽
飭兵勇回擊而賊已停泊河西祇得仍向陸路
急攻河西之賊紛至從我軍後路竄入大街該

署道等力不能支突圍而出退守壽州十八日
馬賊數千步賊數百乘勢來撲距州城三十里
經兵勇迎抵殲斃數十人突有大股數萬直逼
城根該署道督飭在城文武嚴密守禦卽在城
上施放槍礮轟斃五六十名時察哈爾馬隊退
紮城外東津渡亦有斬擒無如該逆愈來愈多
四面合圍並紮營數十座意圖攻陷我軍單薄

且夕難支而廬郡兵勇甫經收集器械不齊現
又探聞賊匪數萬於日內由舒城五河巢縣三
處合攻廬州卽使士卒用命而四路圍偏糧絕
援孤將蹈桐營覆轍前奉

旨飭撥之直隸湖北甯國兵各一千名旣難剋期趕到
而巢縣賊衆圍窺柘皋距廬已近該處防勦兵
勇祇有二千不得已抽派四川壽州各兵勇一

千餘名馳往堵禦通計各營實在無從再援適
協領關保帶領馬隊抵營因添募壯勇數百令
其就近援應第賊多兵寡制勝殊難已飛咨勝
保星夜往援該州水陸皆通或至臨淮則餉道
文報斷絕或至蒙亳則逆捻土匪勾通皆有北
竄之慮亟須重兵解圍惟有仰懇

天恩迅催勝保督率大隊剋日前往毋爲他處牽掣庶

可保大局而靖逆氛至廬城危急萬分全賴將士出力而餉糈久匱軍心不固譁潰堪虞應懇恩旨再催山陝江浙等省立撥餉銀兼程來廬不得稍緩須臾

福濟鄭魁士又奏言臣等據報知賊匪突撲柘皋副都統穆克登額等僅帶馬步兵勇二千極力抵禦割獲首級七十餘顆羈斃數百人嗣復

兩次來撲均經擊退二十六日賊忽添大股一
二萬人撲營猝被圍逼我軍施放槍礮漸不能
支退至石塘橋駐守查柘皋距廬祇數十里孤
城危急已在呼吸之間昨派赴援柘皋之川兵
川勇雖令先紮店埠而能否截擊殊未可知其
直隸湖北甯國等兵斷難卽來應請

旨飭令和春就近酌撥精兵二千德興阿就近酌撥精

兵一千飛速救援遲恐無及奏入

上命軍機大臣傳諭福濟英桂勝保曰逆匪擁衆數萬由正陽進逼壽州四面合圍情形萬分緊急雖經福濟由廬州撥兵堵禦惟逆勢方張恐兵力難支勝保此時正在勦辦捻匪北路藩籬亦關緊要能否分身前赴壽州殊未可定著英桂勝保迅卽籌商如勝保可以前往卽行酌帶兵勇馳往救援如一時未能兼

顧亦應派兵助勦不得因地處淮南稍存畛域至柘
皋防兵失利退守石塘橋廬州門戶已失前調湖北
皖南兵各一千名本日已降旨飭催並諭湖北再添
調一千名由宿松太湖一帶赴皖其德興阿和春營
中兵勇前據奏報實已無可抽撥所有江北派出之
官兵五百名早已抵廬丹陽派往之官兵八百名卽
著福濟趕緊催提以資攻勦所請飭催餉銀之處已

據戶部疊次飛催矣

上又命軍機大臣傳諭官文胡林翼晏端書曰前因皖省無爲州城被陷卽諭官文等分兵一千名赴廬助勦嗣因桐城兵潰廬州喫緊復經諭令官文等將前調官兵迅速派往並諭晏端書鄧紹良就近酌撥兵一千名或數百名渡江繞道赴廬州軍營本日據福濟奏逆匪大股衝撲柘皋我軍迎擊失利柘皋距廬

祇數十里孤城危急該處需兵情形實屬萬緊前諭
官文胡林翼派調之官兵一千名無論刻下業經起
程與否著再添派官兵一千名並派得力大員管帶
由黃州至宿松太湖一帶馳赴廬州軍營交福濟調
遣至前諭在甯國軍營酌撥兵一千名並著晏端書
飭令迅速馳赴廬營藉資援救毋稍遲緩

福濟又奏言臣撫皖以來適值賊踞廬州屬邑

皆失籌兵籌餉寢食不遑竭蹶數年心力俱瘁
上年五月間因積受潮溼觸動舊患肝氣齒臂
並痛徹夜不眠不得已請假一月趕緊調治第
念疆圉未靖何敢懷安故疾未大痊卽行銷假
八月後攻克巢縣進勦桐城本年正月初復因
廬州告警折回守禦往返積勞加以晝夜巡防
精神益困刻下桐營潰退舒六繼陷餉絀兵單

支持乏術萬分焦急鬱憤傷肝遂至頭暈耳鳴
變而加厲雖應節勞靜養而時勢孔棘正當力
疾從公惟軍務與地方斷難兼顧若勉強經理
恐致兩誤再四躊躇惟有籲懇

天恩將安徽巡撫開缺另行

簡員補授俾臣專辦軍務不至分心庶免顧此失彼之
慮奏八

上諭內閣曰安徽省自和春調往江南鄭魁士復經獲咎福濟以巡撫督辦軍務責任至重況現在賊匪臨張屬邑被陷軍務與地方公事均屬緊要何得以微疾輒請開缺致負委任所請著不准行

福濟又奏言已革陝安鎮總兵郝光甲出兵數年戰功懋著臣撫皖以來見其打仗奮勇每戰必先深資得力茲以赴援桐城孤軍深入後援

無繼竭力抵禦卒以衆寡不敵臨陣捐軀合無
仰懇

天恩准其開復原官並

飭部照總兵陣亡例議卹出自

逾格鴻施奏入

上從之

初六日
戊午
胡林翼奏言
臣接奉

諭旨因桐城兵潰廬州喫緊令臣等撥兵往援臣卽於
臬司李孟羣所帶兵勇內精選一千五百名先
行裹糧赴援皖省一俟湖北全境肅清再選精
銳陸續資遣至外江內湖水師當此春漲初起
自應會合夾擊肅清湖口趕緊直下以分賊勢
業經臣知會楊載福彭玉麟迅速遵辦再河南
捻匪竄入固始與湖北之麻城毗連英山霍邱

聞

賊匪竄起與湖北之羅田蘄州毗連均在都興
阿大營之後臣卽挑選興國各營迅速渡江急
扼蘄州之張家塆以資堵剿奏入報

初七日 己未

上命軍機大臣傳諭怡良曰從前張國樑與福興共事
尙能迅解金壇之圍乃自和春到後數月之久句容

一邑仍未克復是否和春與張國樑意見不合以致該鎮未能用命軍營統帥全在得人儻駕馭無方便健將不肯出力貽誤匪輕怡良近在常州必能確有見聞著卽確查密奏至余萬清收用劣員盧應翔經和春奏請撤去幫辦軍務業已降旨允准惟余萬清攻剿鎮江如果不能得力該大臣早應據實叅奏何以因收用盧應翔一節輒請撤去幫辦恐和春因該

員別有劣蹟遇事而發著怡良一併密行查訪如余萬清平庸著該督會同和春於江南軍營內察看何員可以接辦鎮江軍務酌保一二人速行奏聞候旨更換

初十日壬戌和春奏言溧水之賊於二月初七日

竄至曹村一帶焚掠卽飭副將魯占鰲等帶兵往剿斃匪無算賊猶抵死不退張玉良等從旁

抄襲各兵乘勢而進又斃賊百餘名金陵安慶之賊竄至鄔山築壘副將米興朝等分路進攻該逆槍礮回擊子密如雨總兵傅振邦督同張玉良等進攻並於山後埋伏逆匪約出五六千人迎拒我軍奮勇攻勦刺殺多名該逆直前來撲兵勇誘至山後伏兵齊出兩面圍抄馬隊攔腰橫擊逆匪紛紛倒地大敗飛奔城內之賊於

西北門突出二千餘人分撲各營經副將魯占
鼇等迎擊殲斃不少二十二十一日逆匪過
河築壘李定太等帶兵分途齊進逆匪出巢迎
拒我軍痛加勦洗該逆拌死拒敵李定太衝入
賊隊周天培等帶兵搶至賊壘外濠槍礮連環
賊衆驚潰越牆逃出我軍乘勢擁入盡數砍殺
卽將賊營四座奪獲餘賊過河不及落水死者

無數兵勇搶過河岸併力擊殺又斃多名追至
鄔山尙有賊壘隨卽緊圍頻施火器逆匪驚亂
越濠兵勇擁進將賊壘五座奪獲餘匪向柘塘
奔逃我軍跟勦柘塘之賊亦棄壘狂奔兵勇窮
追斬殺尤衆該處賊營一律踏毀西北兩門復
出賊二千餘名徑撲川勇營盤經米興朝等奮
擊張克愼等設伏坡下逆匪愈逼愈近伏兵猝

起左右衝突逆匪驚慌逃竄追殺數里死者枕
藉先後共奪獲賊壘二十六座約斃賊三千餘
名內有僞靠天侯馮得涓並僞指揮檢點司馬
十餘名二十二二十四等日我軍仍奮勇攻城
逆匪惟一意死守臣仍飭令趕緊追勦迅圖克
復

和春又奏言句容逆匪經官軍節次痛勦殲斃

甚衆二月十七日官兵分途進攻北門外賊壘
突出賊二三千人兵勇奮擊槍礮連環立斃多
名該逆敗退我軍追至濠邊盡力刺殺正得手
間東北門各出賊千餘人來援張國樑揮令兵
勇以槍礮轟擊斃賊無數賊勢大潰官軍跟追
槍至外濠西門又出賊千餘欲抄襲我軍後路
經臣飭令王浚等攔腰截殺王浚戴文英衝入

賊隊立刺黃衣悍賊數名餘賊驚潰我軍追至
西門橋邊逆匪過橋不及溺斃不少南路經明
安泰進攻該逆拌死拒守兵勇直進槍至外濠
拔去梅花椿正擬搶進內濠突出逆匪數千分
路來撲官軍迎擊該逆愈來愈多都司金昇等
伏兵山坡衝突出三面夾攻斃賊無算賊勢
大敗官軍合力追擊連放大礮火箭擊斃紅衣

賊目六名燒燬更棚數十處哨樓六座適山後來賊千餘官兵迎截殲斃多名始行敗退直跟追至南門兩路共約斃賊八九百名其鎮江踞賊二月十八日余萬清派隊進攻南水關虎頭山賊營該逆突出一二千人蠡擁來撲副將站住等揮令兵勇奮擊立斃多名東北兩門復出賊千餘人意圖抄襲經副都統巴棟阿等伏兵

齊出一擁而進該逆潰敗我軍會合追殺逆屍
徧野正酣戰間金山又出賊數百人經遊擊王
夢熊等迎截該逆退走餘卽飛奔入巢約共斃
賊五百餘名臣仍飭令趕緊攻勦迅圖克復奏
八

上命軍機大臣傳諭和春張國樑曰句容溧水不過蕞
爾小縣該逆牽掣我軍而分其黨與四出滋擾現在

安徽巢無舒六相繼失陷賊蹤距廬州僅數十里情形萬分喫緊池州蕪湖之賊窺伺徽甯浙防又形喫重總由大兵不能進逼金陵故該逆得以安居城中從容布置現當各省荒旱兵餉缺乏日復一日伊於胡底和春前在安徽督師得力張國樑在江南軍營亦素稱勇敢何以區區二邑曠日持久不能攻克著卽督飭將士謀勇兼施先將兩城攻下以便移師金

陵使該逆有所顧忌而我兵亦可分援安徽等處以
期次第廓清

十一日 癸亥 福濟鄭魁士奏言據署廬鳳道金光

飭稟稱二月十九日賊船數百號賊馬數百匹
向西北撲來城上開放火槍擊斃馬賊六名賊
旋退回二十日該逆擁衆由南關攻城該署道
會同遊擊成桂等督飭署壽州知州黃元吉署

鳳臺縣知縣李霖統率兵勇由西門出城繞撲賊營該逆迎拒經勇目李士申等及壽州營兵奮擊刺斃賊數百名斬首五十餘級焚毀賊營七座二十一日該逆由東門外蠡擁而來我軍開礮轟擊當斃馬賊數名步賊數十名賊不敢進遙聞東北十餘里外槍聲不絕係團練姚紹孔擬在該處築壘遇賊接仗其北門外四頂山

忽見黃旗徧插恐賊紮營卽令李霖督飭勇日
朱在國縋城衝擊該逆東遁二十二日以後該
逆更番攻城徹夜衝突間用雲梯爬城並皆擊
退至二十五日被圍已歷八晝夜外援未到姚
紹孔練勇亦潰因商同各文武挑選奮勇出城
血戰一面暗約鄉團在十里外放火喊殺二十
五日夜調齊兵勇衝出東門各鄉火光四起該

逆不知虛實疑我援兵猝至內外夾攻蒼黃失措棄營狂走互相踐踏死者不計其數該署道等追剿二十餘里計斃賊三千餘名割獲首級六百餘顆城圍已解等情查壽州係淮南重地該城僅以數千兵勇支撐八日之久非謀勇素裕斷難保此危城金光筭等激勵軍民同心守禦出賊不意暗布奇謀遂令逆鋒頓挫立解重

國寶屬識力過人亟應仰懇

恩施金光飭擬請

賞加按察使銜署壽州知州黃元吉擬請

賞換花翎署鳳臺縣知縣李霖擬請

賞戴藍翎其餘出力員弁等臣等擇尤酌保賊雖回竄

正陽該署道業經追勦惟逆衆數萬非孤軍所

能支持應懇

天恩飭催勝保督帶大隊由正陽進剿六安與皖軍會合方能廓清餘孽臣等駐守廬州三面皆賊竭力守禦勉強相持斷難他顧如勝保能剋日抵六藉分賊勢當可轉危爲安奏入

上命軍機大臣傳諭英桂勝保曰據福濟等奏壽州匪衆經署道金光飭連日擊剿城圍已解請飭勝保由正陽進剿六安以分賊勢勝保現由烏龍集回剿潁

匪諒必續獲勝仗如該處股匪漸次掃蕩可以無虞
北竄自應徑趨六安會合皖軍藉分廬州賊勢廬州
三面皆賊情形甚爲喫緊福濟兵力甚單必須速爲
援應著卽與英桂妥速籌商酌量辦理

上諭內閣曰安徽賊匪竄撲壽州署廬鳳道金光飭等
於賊匪猝至之時激勵軍民同心守禦遂能出賊不
意大挫兇鋒立解重圍自應亟加獎勵安徽記名道

員署廬鳳道廬州府知府金光飭著賞加按察使銜
記名知府署壽州知州黃元吉著賞換花翎署鳳臺
縣知縣李霖著賞戴藍翎其餘出力員弁人等著福
濟查明保奏

福濟又奏言查制勝之要貴乎諸將同心故師
克在和爲千古不易之論今秦定三鄭魁士威
名相埒去冬合勦桐城互相猜忌所帶兵勇亦

各懷私忿臣遇事調停雖不至釀成事變然爾
私未化實難共事一方鄭魁士辦事實心係皖
營不可少之員且本省總兵自應仍留督勦秦
定三前由金陵帶兵援皖應令仍回江南隨同
和春勦賊敢乞

明諭飭令秦定三貴州兵折回江南助勦於兩處軍務
各有所裨奏入

上諭內閣曰句容溧水逆匪負隅日久疊經官軍勦辦
尙未克復著秦定三卽統原帶之貴州官兵前赴江
南大營隨同和春等合力攻勦

福濟又奏言據總兵音德布函稱連日逆匪由
黃泥壩赤泥壩等處環紮營盤圍撲愈緊該總
兵督飭將弁兵勇齊力抵禦晝夜苦戰明攻暗
襲屢挫兇鋒而賊聚愈多重圍難解二十一日

該逆在金家樓施放火礮距營里許不得不出
奇制勝是夜四鼓潛令兵勇將火箭噴筒乘風
施放焚燒賊營內草棚該逆拌死拒守須臾火
藥房轟發始各驚潰我軍直前截擊斃賊無數
遂將賊營毀平二十三日李官保莊等處之賊
自焚其營退回螺螄灣三里岡五里墩等處雖
係畏威思遁而賊情詭詐不可不防旋據探報

賊將赴西鋪紮營絕我糧道並阻含山昭關之
路該總兵當卽派勇在彼埋伏另派兵勇伏於
中路山岡天色漸明果有賊衆千餘直奔西鋪
伏勇驟開槍礮賊已大驚中路伏兵衝出斃匪
甚多賊愈不支遂皆潰散等情查和州一旅屏
蔽滁全且爲廬城後路從前江南各賊米糧皆
取給於此故必與我力爭現經該總兵竭力支

聞

持慶戰二十餘日始行擊退一時雖可無虞而
江南一水相通誠恐糾黨復來臣仍飭令該總
兵相機堵剿毋稍疏虞奏入報

十二日甲子秦定三奏言查廬州爲皖省心腹臨

淮爲皖省咽喉東南賊氛未靖西北逆燄方張
兼有餘掄出沒淮泗之間河道梗塞餉路難通

軍米亦無從購辦關繫匪輕福濟等籌防廬郡
當此萬緊之時斷難分兵他顧然北路情形亦
甚緊急未有舍咽喉而心腹可以久固者臣所
帶黔兵一千早經帶傷過半新挫之後道路流
離前次清釐兵數來廬者僅數百名經福濟撥
餉撫恤並酌撥槍礮交鮑雲翥帶領暫駐店埠
防堵一面招集新兵補足原數惟正六一帶不

僅賊逆須勦卽鳳嶺各屬拾匪乘機勾結在在可慮且和春所撥馬隊尙未到皖勝保袁甲三縱能酌撥援兵亦恐緩不濟急臣所帶兵一千二百名水陸兼馳萬難敷用茲與福濟等籌商於萬無可撥之中酌撥富和所帶吉林馬隊二百五十名慶瑞等所帶陝西兵五百餘名先由臨淮前進以通餉路卽一面赴正陽關由水陸

進攻清淮北之咽喉正以保廬州之心腹實於
餉路有裨將來類屬路通豫省米糧亦可源源
運解南路軍心可期漸固全局攸關不得不力
爲籌及至兵力單弱惟有懇

恩由北路迅撥馬步精兵並請

旨飭撫臣撥給糧餉俾壯聲威而資軍食奏入

上命軍機大臣傳諭福濟奏定三曰現在廬州三面皆

賊勢成坐困所恃以通餉道者惟在臨淮一路卽福
濟前奏亦稱逆匪若由六安直達臨淮則軍火糧餉
無路可通是保全臨淮實關廬州大局該提督現旣
帶兵前往著卽暫留臨淮一帶俟剿辦就緒再行前
赴江南至請由北路添兵助剿之處此時實無可分
撥勝保現在潁州剿匪儻彼處得手自可馳赴六安
會剿正陽一路與臨淮聲息相通袁甲三業已帶兵

前往俟到關後卽可與該提督合力進剿